

大鬧廣昌隆（唐健垣唱）

— 客店遇鬼 —

【八板南音板面】

【自由起唱南音】檀板響，各位喜地歡天。各位聽完呢一段，咁就快樂年年。
話說有一位，落第嘅秀才，叫做劉君獻，佢在羊城賣絨絲線，日日係四圍捐。
有一日生意滔滔，未得係回鄉轉，無奈暫投一間旅店，咁就欲得安眠。
點想時運低兼命蹇，有一間客房有鬼，徧徧就住入裏邊。
原來客店從前係隔離妓院，有個姑娘廖氏，咁就吊死在床前。【腔】

【南音短序】

好啦，劉生佢入房，放下啲東西。只見床鋪枕蓆，擺設樣樣整齊。
但係有一道靈符，貼在門扇裏底，又有一揸楊柳，在門角來擠。
咦！個擺設咁邪門，似乎專為治鬼，吓！何況房門上便，又掛一幅鍾馗。
劉生佢從前，係唔信有鬼，自問生平正直，亦無心虧。
咁佢洗面上床，就捐入被底，咦！點知未曾合眼，又覺得心跳神迷。
【中板】房外飛沙走石，嘈嘈閉，（白：汪汪！）雞鳴狗吠，唔知做乜東西。
跟住啪一聲，道房門個陣無風自啟，（白：呼！）陰風陣陣，有個女人躡入嚟。
鮮血淋漓，睇見就反胃，嘩！佢又披頭散髮，企在開底（音低）。
劉生閉目，真係唔敢睇，呢次弊啦，（白：觀音呀！）牙關打震，震巍巍。【腔】

【南音短序】

【慢板】嘩個隻鬼魂入房，雙眼放綠光。吓！因何在我床上，瞓一個少年郎。
個陣女鬼飄上前，佢高聲喝響，（白：喂你仲唔走！）你走遲一步，我就把你生割。
劉生聞言，真係心膽喪，佢就無奈咯，伸出個頭，哀叫一句姑娘。
我係落第秀才，（白：我賣絨線嘅。）唔係賊黨，今日收工遲滯，係惡還鄉。
我到嚟投店，佢話剩得呢間房咋，我但求一宿，無心嚟攪擾阿姑娘。
係呢，阿仙姑，你得咁悲啼，係因何命喪，你有何冤枉呢，得咁心傷。
你若有冤情，不妨對我直講，我共你衙門去伸訴，免你咁悲涼。【腔】

【南音短序】

【中板】哦！女鬼聽聞君話講，原來君子你係個秀才郎。
若要我把根由，來直講，又怕秀才唔肯為我幫。
唏！劉生回答，話我就唔會咁樣嘅，我若還做得到，不怕昧水舂牆。
但係煩嬌，你轉變花容樣，（白：好嗎？）免使見你花容，使我帶有驚慌。
我心驚膽跳係聽唔到你講，勞煩把你花容轉變，咁我慢慢商量。
個女鬼答言，佢話我唔變得個樣，因為冤仇未報，我係要咁兇狠。
咁啦，煩君你落下個道青紗蚊帳，等我冤情來訴上，免使陰陽相撞，使你驚慌。

劉生話，（白：係咯好啦，）你因何命喪，含冤咁嘅樣，請你從頭細說端詳。。【腔】

【南音短序收】

— 陰魂訴恨 —

【自由起唱慢板乙反南音】嗰陣冤魂聽，淚紅飄。多承你相問，我叫做廖小喬。。

【中板】只為幼年我雙親喪了，幸得孀娘憐憫，養育我阿嬌。

不幸叔父為人真不肖，為咗白銀二百兩，就賣我入娼寮。。【地水腔】

【地水無限序】

唉！呢啲皮肉生涯，把我命要，為咗花銀二兩，我捱到通宵。

我就積少成多，銀不少，積有銀不少，只望從良贖身，永別娼寮。。【地水腔】

【地水無限序】

唉！有一日，遇著一個客人，叫做懷安，佢身姓趙，佢係假情薄倖，又無腰。

將我白銀完全來騙了，佢就心腸改變，對我眼尾都唔瞧。。【地水腔】

【地水無限序】

唉！我人財兩散，悲不少，時常自怨，苦命嘅阿嬌。

嗰晚人靜三更，我哭不了，人靜夜闌，心如刀擣，我就紅衫穿上，

投繯吊死在繩條。。【地水腔】

【地水無限序】

唉！君子呀，自從我懸樑死了，我就晚晚回魂，响處鬧通宵。

想話去報仇，但係無路票，今日得逢君面，望你幫我雪恨迢迢。。【地水腔】

【地水無限序】

【正線】唉嗰陣劉生聽話，唉！姑娘你確慘淒。但我如何為你，報得仇嚟。。

個女鬼話，呢層你唔使閉翳，我有白銀三百兩，在地下藏低。

就在秀才你床下底，上頭為記，有堆浮泥。。

吓！劉生答話，我唔敢制，你哋陰曹所用，乃係金銀錢溪。

呢啲冥幣，陽間無人使，個女鬼話，你毋庸誤會，呢啲乃係銀嚟。。

明日你起床，掘出來睇吓啦，咁你自然掘到，嗰啲白銀閃閃生輝。

然後去城隍廟內，買一張路票，仲要買把新遮仔，咁我就匿埋遮入便，跟你去周圍。。

...

...